

本朝分省人物考

人物考卷之一百四目錄

陝西西安府二

馬理

嚴天祥

東野

韓邦靖

韓邦奇

呂枏

楊淳

李崇光

王元正

南大吉

東漢

張緯

李宗樞

盧紳

閻溥

康河

周吉

王縉

楊爵

呂應祥

王維楨

喬世寧

魏學曾

李世達

南逢吉

杜崇

張原

劉琦

張治道

胡侍

王懋

裴紹宗

許宗魯

杜鸞

周尚文

楊宏

補遺

郭文

劉昭

鄒應龍

孫丕揚

溫純

趙應元

馬自強

雒于仁

李伸

本朝京省人物考卷之一百四

陝西西安府二

馬理

馬理字伯循三原人學者稱爲谿田先生初以春秋中弘治戊午鄉試再試禮闈未第游太學與呂涇野崔汝渠諸公相切劘而文章德義名震都下高麗使人亦知慕之錄其文以歸乙丑喪生母庚午又喪父祥禪中會檢三禮編集成書安南貢使問禮部主事黃清曰關中馬理先生何尚未登仕籍其名重外夷若是至甲戌科復上春官公卿以下咸欲識面四方

學者至聚觀之乃以詩中式廷試二甲授稽勲主事
改文選與郎中不合引疾告歸者三年戊寅復任值
武廟將南巡理與黃輦諸同志伏闕極諫雖受廷
杖 駕亦遂止未幾送母劉淑人還鄉乃設教于武
安王祠藩臬諸君爲建嵯峨精舍以居生徒劉卒後
尋起轉考功郎中丙戌例當考察外官時內閣冢宰
各挾私忿欲去廣東河南陝西三省提學理乃昌言
曰魏校蕭鳴鳳唐龍今有數人物若欲去此三人請
先去理由是獲免其保全善類如此丁亥陞南通政
赴任過河池見驛丞貌類黃輦問之乃其弟肇叔開

也泫然淚下厚禮之旣乃作詩贈之有六年復覩先生面爲過河池見叔開之句戊子引疾告歸辛卯陞光祿卿至則釐革宿弊裁省冗員癸巳疏病歸林下者十年癸卯復起南光祿而年七十一矣引例陳乞乃得賜歸卽隱於商山書院諸生問道者遠近踵集山中野服鶴髮童顏望而卽之飄然仙風道氣也如是者又十餘年而始告終每出不一二年卽歸歸必十數年而後起綽綽然于進退之間雖欲磨涅者亦末如之何也

嚴天祥

嚴天祥字叔善號雙洲朝邑人也生而靈異穎悟過人八歲能熟誦大學論語卽通其大義十二入縣學歲試兩魁諸生僉憲開州劉君珂有精鑒得其卷曰嚴生國士也於是遠近無不推嚴先生者庚子中陝西鄉試第六刻經義爲士程甲辰登進士授絳縣知縣期年而絳治人知向化野無盜賊案無停牘積獄幾空有兇犯毆傷人股致死者累檢無傷祥取二股骨察其形色長短新舊不同訊之兇犯具服蓋吏件受犯賄潛以他人枯骨易之寡母告子不孝祥廉得母與僧姦狀憐而釋之亦不治母曰子母之際難言

也撫按有疑獄輒以付之克明克允其治絳也不以
刑罰爲威而以廉故豪猾畏不以賑費爲惠而以靖
故民衆懷不以戒令爲期而以信故庶績熙而又敏
達勤慎時環三晉而郡縣者七十餘絳縣治行第一
戊申徵拜四川道監察御史未幾疾作彌留卒得年
三十有六祥性孝友五六歲時每遇美果食必先奉
母旣長朝夕惟以承歡父母爲念母病泣跪進食呼
天而禱父落一齒持之泣累日嘗因事諫父父怒以
履踏其面笑而受之父乃感悟絳平陽富邑祥三年
間俸薪外分毫無取去絳時僚屬士民爭以饋進皆

不受曰取予士人之太節豈以去絳而遷其守乎其
居身之珍治絳之美實兩無所歉云

東野

東野華州人三歲喪父五歲讀書學禮十五從師而
受尚書二十舉於鄉明年舉進士又明年爲陳留知
縣陳留去藩服近民多健訟訟輒赴臺省不干縣吏
縣吏顧無可奈何野至爲聽其大者劇者而於細事
以義退之無留滯焉於是皆仰戴之呼爲神明而於
大且劇者不復赴臺省惟赴愬於縣其一切細故輒
相解釋無敢以煩瀆者河濫於縣北害于耕稼野乃

謀諸治河者築堤拒河河之舊埒於是爲桑麻之地
百里焉流亡之民皆復來歸賑貸之各有生業蓋戶
口增以千計邏卒趙獻者有仇讐夜入刺獻死匿去
弗可得衆以爲弗得也乃竟得之縣故多盜於是盡
散去爲農無復敢爲盜者陳州俠劉某者都指揮之
子也嘗懷千金爲俠俠嘗殺典史善賂自脫事故久
不決事下野法當往閱死者因與期月某日當往乃
謬謂有他不往矣蓋是時指揮已伏百人劫俠聞不
往卽散後竟往得窮其事殺俠於是河朔數百里之
間又皆仰戴之呼爲神明皆欲赴愬陳留向者學舍

諸生惟知有科舉書不復知有古文遺書諸史子集也於是購得之俾誦習焉而又設小學擇師傳教童子親爲校閱勤懇甚備也開封轄縣三十先是言破敵者必於陳留至是沃野綿亘耒耜相望風雨之會又適其時年穀屢登盜賊稀少歌誦之聲徧于鄉東西行過是縣者罔不改視易聽而撫按交章論薦問勞之使結轍於道正德丁卯秋吏部以御史起野引年不當爲御史乃爲刑部福建清吏司主事云其年冬視獄獄中夜三四起視獄未久疾作猶視獄獄中旣代出旬日乃遂不起年僅二十有六

韓邦靖

韓邦靖字汝慶朝邑縣人自稱曰五泉子母夢五色雲中奏咸韶之音已而玉女十餘持蓋擁一童子入室覺而生生而靈異三歲而能誦古詩百餘首四歲而能通孝經五歲而讀論語文王至德篇掩卷若有所思者父問之對曰卽如武王非矣八歲而通舉子業十四而舉于鄉二十一而舉正德戊辰進士已巳拜工部主事奉部檄十庫監收庫宦官不爲禮邦靖自坐前席宦官怒紿曰部尚書至因起撤坐邦靖詰之答曰公無與庫事者止一飯耳邦靖曰然則吾當

去矣答曰當署案邦靖曰豈有署案不與庫事者乎
竟前席坐署案尋又兼收黑窰廠主廠者宦官厚燕
接殷勤之歡邦靖不顧自起視秤分毫無所假宦官
雖怒甚然無可奈何未幾抽分浙江先是抽分部使
者往往避嫌乃重取於商爲羨餘以自白邦靖乃下
令曰非巨木若竹木成器者不稅稅課舊領府幕官
乃奏議寄布政司不與府幕官以部使者侵漁而府
幕者易與耳又奏抽分司刑獄宜下按察司以防出
入詔皆可故事抽分司覬鎮守太監歲千金是時鎮
守劉太監者又谷大用之黨邦靖固不與金劉太監

怒後知其爲人愈益敬之會宦者從京師來倚其近倖索抽分錢甚急劉太監從旁勸曰幸無求韓主事我當有以贈公也及代人奏乃課不足部尚書及工科給事中皆以法劾邦靖亦自劾求罷會國老有知其故者賴以無事壬申春南北畿內山東河南諸郡盜起天子命將征勦工部官例一人前除當前除者數人皆懼不敢往言之部尚書有泣下者次不及邦靖部尚書知邦靖素勇可使數目邦靖邦靖毅然請行後亦有天幸不害北歸遷負外郎奉部檄清查直隸山陝諸路歷年班匠銀兩旣見其民貧乃奏議

罷徵是時急於用財不許後以乾清宮災竟罷之以
災異訪求直言邦靖上疏極言卽位以來朝政不修
經筵罔御盤遊無節狎近羣儉摧折骨鯁之臣閉塞
諫諍之路百度乖違庶事叢挫府庫空竭閭閻流散
盜賊災異薦至迭興危亾之形已成社稷之憂將大
疏上 天子震怒下錦衣衛獄給事中李君鐸率衆
論救之乃奪官爲民 世宗卽位起爲山西左叅議
分守大同革奸平獄權豪斂跡是時 天子脩定策
功封爵太濫而高山陽和諸衛軍士奉例開墾草場
數千餘頃皆爲豪家占種前後上疏論列皆不報未

幾大同歲饑人相食又奏議請發內帑賑濟不許爲之憮然泣下輟食復抗疏論列累千餘言不報乃上疏乞歸都御史張公文錦奏留之而歸志已決復上疏報未下卽行西歸之日軍民遮留道上以萬計號泣不忍舍去至家稱觴壽母與諸兄弟燕會終日甚樂也乃未幾病卒年三十有六

韓邦奇

韓邦奇字汝節陝西朝邑人正德戊辰進士仕至南京兵部尚書卒贈太子少保謚恭簡性剛直尚節槩初舉進士值劉瑾亂政朝士奪氣同年多往謁之邦

奇卒不往爲時所重爲浙江按察僉事分巡杭嚴獨
持風裁凡鎮守并織造中官有所求爲率裁抑之積
忤旣久後因富陽縣產茶與鱖魚進貢採取時民不
勝其勞擾目擊其患作歌曰富陽山之茶富陽江之
魚茶香破我家魚肥賣我兒採茶婦捕魚夫官府拷
掠無完膚皇天本至仁此地何辜魚兮不出別縣茶
今不出別都富陽山何日頽富陽江何日枯山頽茶
亦死江枯魚亦無山不頽江不枯吾民何以甦後被
鎮守奏以作歌怨謫阻絕進貢逮至京下錦衣獄褫
其官初被逮時杭府縣贈錦衣官校金祈途中寬梃

斥之曰死則死耳何以金爲及府縣贈以路費揮之
挺挺不屈真烈丈夫也已得釋陞山西叅議分守冀
北弟邦靖嘗以是官威行惠懷甚得士民心旣下車
鴈門士民父老園告曰先使君之治誠善願使君守
而勿失感慕咨嗟有泣下者後所行一無改于舊民
甚安之擢都御史巡撫山西政益嚴肅守益儉朴間
日以廩米易肉一斤有司供餽悉拒不受廳事惟二
小青衣侍立三司官入揖議事數語而決公庭如水
不聞履聲諸王府總兵武衛官俱相戒不敢犯陞左
右侍郎久之陞南京兵部尚書廉簡鎮靜寡交接雖

六卿同列亦罕往返每拜表 聖誕令節赴禮部禮

畢孑然獨行內外守備議事外一不他及威望聳然
性好學老不釋卷尤精於律數所著有律呂直解并
樂書數十卷性極孝友與弟邦靖同舉進士交相砥
礪事父蓮峰先生及閭恭人終身不違顏色愛靖切
至疾于廬幾一載汗惡之氣人咸不堪靖侍側未嘗
少離飲食必親奉湯藥必分飲鄉士夫立孝弟碑爲
鄉閭式後靖病亟日慟泣不解衣不滋味者三月餘
形且瘁靖譬曉之泣曰吾弟憶東坡詩乎來生之因
尚當同兄弟也及靖卒屢廢寢食哭絕衰經蔬食祥

而弗懈嘗謂其友樊恕夫曰世安有司馬遷關漢卿之筆能寫吾思弟痛弟之情吾當以此身報之故樊恕夫碑曰自有兄弟以來中間道德之高功業相映亦多矣至相愛之深相信之篤所見之同如公兄弟可謂曠世少有矣

呂 枏

呂枏字仲木號涇野高陵人生而穎敏特異未總州輒有志聖賢之道夏居矮屋衣冠危坐雖炎暑燦金不越戶限至冬月祁寒則履藉麥草誦恒達曙年十四應試臨潼貧不能假館宿新豐空舍夜夢老人自

驪山而下謂曰爾力學後當魁天下旣試補廩膳生
母宋卒哀毀骨立所居寺中一日聞父疾走還叅政
熊公命驛馬追送弗受父疾尋愈乃居雲槐精舍多
士景從更歷五襁踐履篤實粹盎外著戊辰廷試遂
擢第一人漠然不動若固有之在官二年安西亂疏
請上出宮御經筵親政事時中官惡其言欲嗾殺
之乞養病得歸抵家數月而中官伏誅居家杜門謝
客糲食草茹若將終身以薦起用入朝上勸學疏略
上嘉納時乾清宮災應詔陳言一曰逐日臨朝聽
政二曰還處宮寢預圖儲貳三曰郊社禘嘗祇肅欽

承四曰日朝兩宮承顏順志五曰遣去義子番僧邊
軍令各寧業六曰各處鎮守中官貪婪取回別用又
累進講勸上舉直錯枉疏後引疾乞歸時西安秋旱
禾槁有司槩征租言於當道獲薄征張仲修爲御史
築河東書院成請定三晉應祀名賢旣論定其祀又
答以書謂今定祀惟取大義不論文辭俾學者知所
趨向文渭陽公病侍湯藥晝夜衣不解帶履恒無聲
如是一年鬚鬢變白丙子父卒哀毀咯血時陝西鎮
守中官廖氏餽以金幣諸物卻之有客托交遊以三
百金求書曰人心如青天白日不意視如鳥獸也其

人慚而退 世宗登極起復館職纂脩 武廟實錄
進講虞書適值 仁祖淳皇后忌辰枹口奏存祿服
之禮罷酒飯之賜癸未克會試同考試官所取士二
十餘人皆名士嘗上疏請溫尋聖學曰學貴知要而
力行故慎獨克已上對天心親賢遠讒下通民志甲
申奉旨修省以十有三事自劾疏上出山西解州判
官至解首恤無告及諸貧困以木綿米肉給之見解
之丁差倍徙他邑乃懇告當路會議分派槩省而解
民始獲蘇復卽廢寺建解梁書院選民間俊秀子弟
俾習小學之節歌豳風之詩又令諸耆德俊民朔望

講讀會典諸禮及行藍田呂氏鄉約凡冠婚喪祭俾
皆尊聞行知察諸孝子義士節婦咸尊奉詔旨題表
其門復求子夏之後令其入學建溫公之祀而考序
其集築隄以護鹽池疏渠以興水利桑麻以導蠶績
於是士民率由風俗丕變屬縣亦觀感而化陞南京
吏部考功司郎中四方從學士及州人皆冒雨送至
河干旣去解人思之不忘豎碑以識遺愛至留都日
親吏牘忘其煩勞陞南京尚寶司卿乃復授學鷺峰
禪寺東南之士及門者益衆壬辰冬陞南京太常寺
少卿迎繼母侯就養又禁道士俗教每月令演樂者

再南京 太廟災例上疏自陳乞罷黜不許時閣大
臣再片再起九卿皆遣人候之塗有約與俱往者曰
生平無一面識不敢輒通刺禮也乙未陞國子監祭
酒首發明監規教人以正心爲本忠孝爲先取儀禮
及爲詩樂圖譜俾諸生講肄諸生皆以德行道義相
先而禮樂并行聲容俱美諸公侯子弟皆率教樂學
諸觀政進士及歷事舉人數就而間業中官沈東亦
時至聽講陞南京禮部右侍郎九卿謁 孝陵着祿
淡衣同僚曰盍着緋公曰上陵望墓生哀服祿爲是
衆從之有蔡生請鹽商墓志不獲同僚爲之請曰生

與相有舊可勿拒曰一書生而遨遊權貴之門得志則下陵可知終拒之署南京吏部印疏薦時賢備任用又薦將材數人尋進表朝賀畢見閣大臣閣臣曰某匪人曰愚與居未知其非祇見其才耳公合天下之才以事聖主可也閣臣不悅返留都累疏乞停止親視山陵及慎重大禮上悉納五月復進聖節表道過河南見餓殍盈途語所在郡縣堙之抵京值奉元殿災例自陳上允其致仕歸事繼母侯孝養備至侯病頭風畏寒親爲艾禡進乃安侯卒哀毀殯殮如禮壬寅七月卒享年六十四卒之日食時復有

大星流光震隕之變遠邇弔者以千計大夫士及門人悲痛如私親巷哭爲罷市三日解梁及四方弟子聞計皆爲位哭著述甚富學士家咸珍襲之

楊淳

楊淳字重夫號繡嶺臨潼人垂髫時恬靜寡言雅有志向酷嗜詩書既登進士後觀政兵部授江西道御史時宦官劉瑾索求科道瑕疵適決大辟衆皆推避無肯行者淳毅然請行大中丞屠公喜其勇敢能任事也而瑾惡其同鄉不附已諷當道改淳工部主事庚午安化王叛王師于征爲之先事前行卒未被差

荊州抽分竹木時川中多盜商販十減四五兼以勢
要請託齟齬旁午一切遏抑不行遷本部營繕司員
外郎管臺基等廠尋差遼東查盤軍器甲戌陞都水
司郎中管理通州南班河道浚決潢污築復隄防一
時糧道稱便京儲頓增時中官方橫舳舻往來陵輓
州司需索無算聞淳咸退避無敢恣者時中貴使西
域取佛船百艘所費萬計聲勢赫熾沿河州司懼不
敢文淳移檄擒泊其黨衆斂迹而去國初工部尚書
宋公禮泊河有大功爲修葺其祠宇復纂王端毅公
之奏議丘文莊公之詩刊爲漕河紀事以永宋公之

功又嘗發庫帑羨金以修孔廟其地舊有徐君墓
乃延陵子挂劍處也亦築祠立碑以表其賢三載再
補虞衡郎中未一年陞湖廣寶慶知府南楚風浮俗
又尚鬼乃首興學校延經師以開勸生徒四擒妖巫
徧毀淫祠始則詞訟盈庭一判數千期月之間浮風
丕變案牘立清民有妻外適而娶妾者其妻生子尋
其父不認赴愬于淳淳注水于盆破其鼻流血于盆
中并取他隸血于盆以辯同異其民遂抱子而泣歸
處其妻如初又嘗奏革岷藩過用桐油船料數萬強
占居民田產數千并擒治其撥置之人及陞山西副

使奉勅管理鴈門等關兵備便道歸家適丁父憂服除改湖廣郴桂兵備郴桂楚之南徼也地雜苗夷俗多寇盜有禪光眼者聚衆數千肆行劫奪皆捕平之行蒙賞賚嘉靖辛卯陞四川叅政次年陞本省按察使次年陞本省右轄尋陞左在蜀日威茂諸邊將常因番夷入寇多殺無辜以邀賞賚累檄諭以禍福勸戒切至諸將感悟在臬司蜀藩贈兼金一百撫臺贈金八十皆不受貯之庫其爲叅政時嘗視篆當放支銀五萬或曰此可得羨餘終不肯放支平生以清忠自勵慕趙清獻之爲人俸祿之外一毫無私子弟

有諷其置產業者乃厲聲訶之曰汝第勤耕力學我不爲汝所役使也見着綺羅者則曰此可易用乎甲午冬聞太宜人訃毀悼幾不生卽日奔歸自是遺榮養素居室蕭然己亥五月十六日有雷震聲異常卽攝衣起危坐若有待者人弗喻其意頃之見星隕于居之西北隅次日延賓談笑間微覺不快遽不起矣

李崇光

李崇光字宗顯陝西高陵人少爲邑學生貢入太學正德庚午授南京國子監典籍事父母能色養得其歡心父疾親嘗湯藥侍臥其側晝夜不解帶旣殯猶

寢苦顏色枯槁其事母疾猶事父也嘗作塋域築堵環之種樹百章羅列成行又嘗代諸兄構屋及爲典籍又以其俸貲作服具畀諸兄國朝典籍書板多在南監縉紳置籍者印千紙例輸白銀伍分於典籍以爲常崇光辭勿受祭酒司業咸嘉之以疾卒於官

王元正

王元正字舜卿盩厔人正德辛未進士改翰林院庶吉士授檢討武宗幸宣大述五子之歌以諷後以議大禮謫戍茂州卒隆慶初贈翰林修撰

南大吉

南大吉字元善渭南人正德辛未進士歷官戶部主
事員外郎郎中紹興府知府守紹興時政修廢舉肇
造晦翁稽山書院萃屬邑髦士教之成者什九科目
由此更盛有學士侵王右軍謝太傅故地悉割歸其
主由是罷歸紹興士民垂涕如失父母歸構酒水書
院以教四方來學之士出其門者多位至方岳文行
名世弟逢吉姪軒皆其所教成立者著有瑞泉集紹
興志渭南志諸書

東 漢

東漢字希節別號渭川華州人生之夕母夢樂聲洋

洋自空中下導一綠衣婦盤捧嬰兒降于寢所而漢
生天性孝友靈穎非常年十一父任按察卒于官扶
柩悲號自蜀及家間關數千里不替比長窮覽墳典
刻厲有志嘗夜不就榻晝自炊食惡衣蔬飫意澹性
恬若不自知爲貴公子者爲學官弟子遂有名戊午
中鄉試高等五試南宮不第正德辛未始就選吏部
授池州府同知語人曰吾母老矣竢必第能養吾懼
薤露之先晞也至池州會造黃冊立法祛弊招亾附
籍戶口增于往昔者二萬有奇劇賊劉七起攻陷劫
掠流掠江湖吳楚間勢甚熾莫之敢禦乃點選民兵

得壯丁數千人陣于永豐鎮鬪壠口山等處晝操夜
守斷絕賊路賊以是不犯又石埭章仁者起兵謀叛
患且不測計殲渠魁餘黨悉散又胡天龍者連結王
浩聚衆行劫衝突無前乃分兵于大洪嶺莊嶺赤嶺
羊棧嶺並通黟祁等處凡數十戰賊敗衄遁三月遂
平有程文寶者劫殺人而匿胡三隆所捕者至文寶
買捕者顧誣指三隆爲劫縛于官文寶獲賞漢察三
隆有冤色鞠之文寶吐實三隆得釋人服其神甲戌
改鎮江府同知治鎮江一如治池大抵察民隱剔政
蠹戢豪右斥姦宄故所至咸仰戴云丙子陞南京戶

部員外郎庚辰陞本部郎中寧藩之變部議齎令兵諸當行者輒辭不往漢獨請行已又返其羨金大司馬喬公聞之歎曰毅哉東員外不可能也旣爲郎中奉檄清查江西錢糧得五百萬石宿弊一洗勞費心神遂以疾乞歸而侍養于家嘉靖甲申陞江西九江知府九江三年修葺文廟辦海賊之誣毀淫祠以正俗殄渠寇以靖難丁亥改南昌南昌視九江倍劇優優理之一如無事時有鎮守黎太監者怙勢張威誅索無忌獨不能干知府見之傲不爲禮遂拂衣出會錦衣使者至意有所干黎璫聞之曰固且止東太

守剛直不可犯也歲大饑出粟賑之他郡悉來就食
不爲禁曰均吾民奈何分彼此邪活者數萬遷九江
兵備副使會當塗弗悅不報戊子陞長蘆鹽運司運
使一年釐弊通商人人戴之爲勒石頌德庚寅上疏
乞致仕侍親 上許之歸一年而太恭人卒哀哭骨
立臥土草于柩側大冬嚴雪未嘗之避

張 緯

張緯字文之咸陽人也自稱曰渭涯子少從學許時
勉舉子業時勉大奇之呼爲小友父歿一哭幾死自
是愈益勵學補學官弟子試輒高等弘治辛酉中鄉

試累舉進士不第其兄勸之仕不肯乃就城北僧舍
誦習甚苦閱二十年而正德辛巳舉進士第明年嘉
靖壬午擢拜江西道監察御史是時天子新卽位
有以佛老進者緯乃抗疏上諫謂新政之始不宜自
入于邪導人以非僻之學目左右儉人朝夕窺伺此
隙一開其勢漸盛履霜堅冰不可不慎其微疏留中
不報江南民鄧愈唐者逆彬用事時爲仇家誣執繫
獄數年不決無辜死者若干人緯立剖得其情在廷
諸老多譽之者甲申巡視居庸諸關峻崖絕澗靡不
經涉所至練武脩備發奸摘伏邊人頌焉大同有變

緯建議以爲恩浮于威無以示戒宜有震動以彰天討事下兵部集議多見采納比代有所舉劾鮮不核實乙酉奉命巡按遼東前此已抱病而是時遼東多事衆方冀其大有爲緯亦自奮欲往會病不果竟以是年卒于京師舍中貧不能具棺殮其友谿田馬伯循武功楊用甫率其嘗與游者棺殮歸其喪

李宗樞

李宗樞字子西富平人嘉靖癸未進士授諸城知縣徵拜監察御史劾都御史汪鋐不法狀出爲河南僉事累遷巡撫右僉都御史以疾卒宗樞有經濟才不

竟所施論者惜之

盧紳

盧紳字汝佩書庵別號也咸寧人少而穎敏潛心問學博覽典墳爲邑弟子自選入正學書院纂修雍大記諸書多所撰述壬午舉於鄉明年舉進士授四川遂寧縣令廉勤自勵治教大行邑人戴之宛若慈母邑瀕大河曩有洚水之患築以魏堤植以密柳水害永消民受其利會蜀連年青災飛蝗滿野獨不入縣境衆咸咤歎焉六載之間折獄明允無橫罹刑辟者庶幾畫像之風歲旱太雩素衣徒步禱於羣祠輒有

甘澍之霈人胥頌之戊子入拜工部主事治水呂梁
有功癸巳往督杭州竹木廠立法寬平商民感德進
貢外郎督造臨清等處輓料兼理衛河提舉時大
工孔亟磚用數倍常額經理維勤蠲省費百工若商
便之運不稽留事有攸濟上嘉悅洊錫銀幣有差
進郎中管理九廟慈寧兩宮勞績懋著廟工
成加俸一級兩宮工成陞二級辛丑擢湖廣按察
司副使撫治荆南加意牧寧鎮靜不擾豪猾巨奸廉
致於法一道肅然撫屬界連川貴諸夷搆兵連歲不
解天子怒下守臣委紳會兩省勘議紳首宣言於

衆曰夷性犬羊先王以不治治之若繩制太嚴恐生
他虞不若開諭利害俾罷兵息民足矣衆從之諸夷
帖服癸卯總理工務有白金綵幣之錫甲辰擢江西
布政司叅政分守湖東瑞州寇起單車往諭解散其
黨歲侵民饑賑恤有條全活者衆丁未擢貴州按察
使清平衛指揮某者暴虐貪婪激變軍士連結諸苗
爲亂驅車入城執首惡以泄羣怒申國典以示更生
梗化之徒感泣紀綱肅然戊申擢山西右布政使庚
戌改山東左布政使宗藩歲祿之供邊關兵馬之
餉諸務旁午紳調停區畫咸麗厥宜辛亥進擢順天

府尹時有勲貴人權傾中外倚勢欲奪畿內民田數百頃者關說京兆紳力拒不顧人以爲難壬子擢戶部右侍郎申寅改左總督倉場兼理西苑農事申明舊章輦車宿蠹清查積貯附餘米十餘萬石以裕國儲然持法過嚴同事有銜之者矣三載考績錄一子洪先爲太學生居太倉三年游蒙銀幣鈔錠羊酒之賜丙辰起拜南京戶部尚書定立章程約束悉鑿鑿可行丁巳循例自陳致仕上賜允歸鑿池畜魚栽花藝竹興至則與二三知友飲酒彈碁論文話舊日以自適紳儉樸冲澹爲人誠恪簡夷於世味泊然絕

無所好雖囊無餘資廩無餘粟而散財喜施不責償
報嘗謂人寧負我毋我負人寧我容人毋人容我立
朝正色直諒侃侃不阿一時交口誦之而沮之者亦
力家居孝弟肫肫事父竹軒公先意承志罔有所違
伯仲二兄蚤世撫其遺孤授以恒業教之誨之不啻
已子關中人士稱之謂爲不可及云

閻溥

閻溥字克周興平人也弱冠受知於學使虎谷王先
生正德丁卯中鄉試嘉靖癸未登進士授刑部主事
已丑晉員外郎郎中辛卯陞直隸保定府知府甲午

陞浙江按察司副使明年乙未被論罷歸溥初舉於鄉年才二十又四後屢困南宮復值家替方其居太學時閩人劉瑾竊政溥爲同邑人或勸爲速化計厲色揮謝退益淬礪講學授徒處貧而樂後卒取上第其在北部研精律例鞫訊不苟原情附律不苟不縱人稱平焉是時光祿崔卿子忿殺鄰婦其子故宰相甥也時宰曲爲請釋謝不往見迫之見復謝曰僕與相公均有法守光祿子罪抵死相公欲生之宰相易法亂道也僕守死不敢易嗣有富室袁氏姻聯鉅璫事下法曹朝貴半爲請託且賂以鉅萬竟置於法朝

論翕然歸之謂爲眞法吏其守保定郡爲右輔路當
八衝兵衛雜糅錢穀獄訟應接不暇盜賊鋒起豪右
戚畹武斷漁獵凡人有不堪者處之裕如若其抵徐
某之罪而攘奪之害革發魏東之姦而府庾之弊釐
塞唐水之泛而沮沒之患熄程邊運之役而轉輸之
勞均嚴課試之方而科第之才盛獎廉勤之吏而郡
邑之政修慎鄉飲之選而禮讓之風醇表節孝之門
而習俗之頽振古稱循良不翅過之癸巳秋大同構
變朝命宗伯黃公猷撫黃請於上遴溥與俱溥乃揚
威布澤持法行權元惡就刑反側向化豎績爲多旣

乃晉副浙臺適臺負闕乃兼攝數事浙人素欽其譽吏慄慄不自存民則熙熙自慰也先時臺中申飭憲度率由舊章謂郡牧臺史先時接見有制凡庭叅止長揖不屈膝今靡靡不自振矣今宜復故一時列郡觀望可否溥曰是何疑哉臺史郡牧均人臣也憲度具在余惟執禮以遇越分媚人吾恥爲之徑揖不顧臺史陽加獎善陰排於同列羣議煽沸鬱而未揚乃闕其去郡攜撫絲髮交閔擊攻乃擲不校浩然賦歸一切仕進棄不置念讀書教子彈碁賦詩飲酒自放漠然於世不相關也卒之日鄉評士論皆惜其闕擴

之才而尚其長厚之風云

康河

康河字德清武功人少質秀發長嗣家學與其從兄修撰海兄貢外浩皆以科第後先興起治詩能得詩人旨奧發爲詞章婉麗溫厚正則平達觀聽者感懲革化風被爲多論者謂其得詩教焉故以之飾吏則司儲司稅以及典郡培本抑末通商裕賦植善布惠才賢之稱播於郎署著於郡國顯奕宏肆駕出流等古云不器居之無忝焉然性爽介與人不瓦合方其居業與同業者平第文翰銓秩人物時出其見以拆

人務奪其氣乃已比其入官乃益殫才効職不畏難
不辭勞不避嫌不規利故由之馳聲亦以之賈怨然
其心則自負無悔也至其解仕而歸脫棄塵俗放情
丘壑期反天真一切世務蠲屏無遺奄然歸盡略無
嬰繫按河中嘉靖壬午鄉試癸未進士歷官戶部主
事晉員外郎再晉郎中出守兗州移守廣西內徙贛
州病歸而卒年止五十有五

周吉

周吉字應貞號一川西安左衛人舉嘉靖乙酉鄉試
再應進士舉不第壬辰就中牟學諭學諭累八年始

遷沁水令前一年調蘭陽蘭陽又一年卽罷歸性剛
鯁負奇氣與人無戲狎平生守經自信力斥陰陽釋
老師巫與諸外家者言始受易副使君副使君大奇
之于是以明經著聲士率來受經門下遇門下士特
嚴重門下士卽年長宦成者猶敬憚如童子時其教
中牟士愈益嚴皆憚而遠之久乃知其方正長者乃
更益服習敬焉督學吳仕聘長大梁書院庚子聘江
西考試官故事考試官率伏聽御史不得自取士獨
以掌故與御史力爭不屈御史亦折節從之是年冬
遷沁水會虜警有令多募民兵力請裁其半歲旱虔

禱輒得雨又賑濟善民不重困以死顧數以事忤上官上官數不善踰年遂調蘭陽是時儀封郭儒毆妻死獄久不成陳州孔某以負債久繫一訊咸抵罪立決貴勢者數爲言已又行賄盡置不理人大稱快焉尚書周用知其能檄令修河未幾河卽就功會御史與縣丞有故以丞有間言于御史御史乃面折之吉亦執對種種有狀人以是目爲周戇然自以峭直不容數乞休歸作得失吟以見志因自號宜休子居官過清苦或勸稍爲子孫計輒大笑不應歸有東郭下田百畝卽爲園日讀書其中著讀易初筮一川野稿

已又自作像贊自經紀其終事其達生若此先是中
牟訓導何漢清者卒于官無子厚賻歸其喪新鄭令
洪勲以百金託遺中貴侍膳者無何勲逮詔獄撫其
妻子還之金人尤服其高義云

王 縉

王縉字朝儀其先廬陵著姓高祖用曾祖頻竝西安
後衛百戶祖璧考鎮竝副千戶遂世襲關中鎮忠勇
邁倫致命朔堃縉以曼倩學劒之年承勾踐納官之
典爛其熊繡突而鷹揚嘉靖六年歲在丁亥馘虜白
羊嶺稍遷正千戶戊子鑒青沙峴庚寅破箬籠嶺竝

捷進指揮僉事甲午戰清水河丁酉援柳樹營積功
遷固原守備旋進都指揮僉事克右叅將分守延綏
己亥伏涼水灣庚子攻孟家塔破高松砦援神木山
殊庸疊懋權副總兵協守延綏辛丑承本兵檄批山
西虜掣風爍電不陣而馳東絕大河逆虜授首摧堅
擊瑕斬鹵越等獻捷音於在泮錫金繒於轅門壬寅
再戰介休功與前埒唱凱言旋假握帥印杆威武堡
搏定邊營虜憺威稜喙息而駭便蕃再賁閩外益光
癸卯進右軍都督府署都督僉事鎮守陝西地方露
布屢聞太常載紀於是實授都督僉事丁未拜征西

將軍總兵官鎮守寧夏方冀永興巨鎮鬱爲長城而以義渠之魴坐剔虎鈕角巾私第不怨不尤時宜嘉賓優游宴喜歲庚戌疾卒享年五十有九縉雅操寬中識局朗濬衽金浴鐵逾四十年北禦狼裔西拒犬戎大戰十數小戰數十獲虜之馘至于二百牛馬器甲蓋無算焉進律登壇計功而得匪冒濫也一值僨蹟遂從吏議爲法受惡口絕辯言豈不惻惻君子哉

楊爵

楊爵富平人也以進士爲侍御史抗直不阿嘉靖中上疏請慰人心以隆治道曰天下之患莫大于以危

爲安以災爲利以可憂爲太平法家拂士日遠而快
意肆情之事無敢齟齬于其間此積弊而蠱所以爲
不可救藥之病也往年夏秋恒暘不雨畿輔千里無
禾歷冬無雪暖氣如春元旦僅雪卽止民失所望洵
洵無聊此正 陛下撤樂減膳率羣下祈惠祐之時
也而大學士夏言數人者方以爲靈瑞而稱頌之不
幾于安危利災以大可憂者爲樂耶大臣之職當輔
君當道志仁先天下以爲憂無忠亮體國之心而居
人臣之極位是所謂小人乘君子之器者也翊國公
郭勛中外皆知其爲天下之惡 朝廷之蠹也迹其

舉動亦豈能有逃于 聖鑒哉顧 聖德優容不忍
卽罪神謀遠慮自有所處臣愚以爲奸不可近惡不
可長若止之于微遏之于漸則 朝廷優禮大臣體
貌未失而武勲餘裔亦得以善其終或使稔惡肆毒
潛干政柄羣邪趨附善類退處于天下國家之禍必
深矣治道去其太甚此其失人心而致危亂者一也
臣近巡南城兩月中凍餒死者八十一人此南城一
郭耳其諸五城尚未知有幾也千里之遠耳目之所
不及又不知其有幾也此皆 陛下之赤子望豆蔬
延須臾之生而不得正 陛下憂民惜財與天下休

息之時也而土木之功累年未止工部屬官添設至數十員又以一方士之故差官萬里遠修雷壇浚民膏血而不知卹窮民之財盡民之力其無乃自蹙其根本也乎今北虜跳梁內寇竊發加以頻年災異上下一空百計取之愈爲不足而興作未已以結怨于天下此其足以失人心而致危亂者二也 陛下卽位之初勵精有爲不遑寧處嘗以敬一箴頒天下于堯舜三王之道蓋心得而服行之矣數年以來朝儀間闕經筵輟講大小臣庶朝參辭謝未嘗得一覩聖容敷奏未嘗得一聆 天語今庶官入覲遠自萬

里孰不欲一望天顏以慰快覩之心而咫尺闕庭
不得一見臣恐人心日益怠惰中外日益抗敝非隆
古君臣同寅協恭以臻太平之氣象也此其足以失
人心而致危亂者三也聖王之世執左道以惑人者
必誅而保傅之職坐而論道古所謂官不必備惟其
人者也今舉名器之重而畀諸迂恠之徒異言異服
列于廷苑金章赤綬延及方外而名器之濫極于此
矣陛下以天縱聖資爲上天元后遠宗帝王之
道近守祖宗之法細旃廣厦與公卿賢士講論治
道則心正身修與天地合德日月合明和氣致祥罔

有_二天災山川鬼神莫不擁護安用假此妖誕邪妄之術列諸法禁而藉之爲_一聖躬之福耶甚非天子所以崇正遠邪平平蕩蕩奉三無私以化天下之道也臣恐風聲所及人趨異教貽四方之笑取百世之譏于聖德國政所損不細此其足以失人心而致禍亂者四也陛下臨御之初延訪忠諒虛懷納諫狂直敢言之士往往矜宥故一時臣工恃陛下能容敢以直言干冒夫聽言過激切而不獲罪者亦多有之比年以來震之以天威加之以危禍如往年太僕寺卿楊最言出而身立死近日左贊善羅洪先

等皆以言爲罪而加之屏斥自今以後雖懷忠義之心非灰心仕進甘退丘園亦必深自晦藏爲保身之計孰敢發口論天下之事以取死亾哉忠盡杜口則諂諛交進上德不達下情不通堂陛之近遠于萬里此其足以失人心而致禍亂者五也疏上下詔獄械繫者數年雖處憂抑中端凝正直卽獄卒咸敬信之久之得釋而會尚書浹有陳論上大恚曰我固知釋爵諸妄言歸過者立至矣命卽與給事中周怡郎中劉魁俱就逮爵時抵家方一日忽錦衣校至曰若復來乎校素敬爵慰之曰吾欲有他往特一省公爵

笑曰吾知之與校同飯飯糲食校不能堪爵啗茹自若也食已曰行乎校曰宜一入爲別爵立屏前曰朝廷有 旨見逮吾行矣卽攬袂行復再踰年乃出

呂應祥

呂應祥字子和號涇陽西安人少警敏絕人日記數百千言督學浚谿朱公補爲諸生愛其文奇之稍長學日益博談諸儒理性上下古今亹亹不竭同學生每聚論環坐傾聽罔不嘉歎以去皆自以爲不及也正德己卯魁省試登嘉靖壬辰進士授行人選吏科給事中旣爲給事以敢諫直言自任無顧忌心曰朝

廷以言官爲耳目也苟顧忌卽蔽明塞聰忍緘默不
爲朝廷所平會京師地震卽偕同科者上書言汰冗
賑貧倡勇恤獄節賞五事已奉命監二十四草場疏
發司場太監通商減芻奸狀已又諫止入道士度牒
金佐內工已奉命同黃御史覆宣大邊懷參伍稽察
盡得其登耗出入之實劾都御史以下若干人人服
其風力已又條塞下便宜十事上之擇將帥重總督
恤將士精器械修城堡嚴烽燧增年例明戰守慎賞
罰振紀綱累數千言皆切事實可施行 上嘉納焉
上幸承天祔 皇太后顯陵應祥以禮科都給事

中從議禮多所匡言還詔賜特優是年內閣與吏部
議選官僚多賂進者於是憤然抗疏略曰臣聞太子
國儲副師友必於天下英俊自三王暨我列聖未有
不慎其選者也頃 陛下詔旨謂不必備員正欲惟
其入耳而選者率以賂聞此豈聖世所宜有安望其
成令德也 陛下不聞里人之愛其子者乎當出就
外傳必慎擇所以爲傳者太子天下本而輔導之官
顧可不擇令若是濫哉臣見臺省員闕必會官推舉
舉多當名實官僚關係不在臺省下獨奈何不會推
臣願罷諸賂進者用會推例推一時英俊以聞疏上

觸執事者怒奪官爲民越五年會恩詔復其冠帶致仕自罷歸日奉母妣孝養備至妣性嚴善怒應祥在側則常懽平居不設城府常葛巾徒步里巷中接人雖貧賤均禮與故舊更款洽多所周急未第時有狂悖隣人加之以橫逆後其人悔懼數獻恭直與之渾相忘如未嘗卻也勅立家廟補四代主歲時率子弟奉祭畢燕坐訓之家政當道薦起用者以十數應祥聞之特扁其堂曰知止積圖書其中日披玩四方從學者甚衆皆相繼成名去當道以渭南地震甚約暫借涇陽郵館顧久不還涇民苦之應祥率諸大夫數

言上官卒還之洪堰水利寢弊寢微乃親爲指授方略著書示久遠此皆非已事而挺然樂爲之雖他亦皆類此使久於位其濟世及物功澤詎可量哉卒年七十二

王維禎

王維禎字允寧陝西華州人舉嘉靖乙未進士改翰林庶吉士授編脩歷官至南京國子祭酒便道過家會關中大震殞于家維禎性亢急於世少所推讓獨與餘姚孫陞游陞與維禎同舉進士爲史官日聚著作退朝輒相與就舍持文墨議論終夜不輟以爲常

有故則走豎子挾策進之務相攻錯瑕瑜不掩以是
二人甚油油然久相好也維楨爲文法司馬子長詩
法漢魏近體法盛唐九宗杜氏居常好深沉之思務
引于繩墨必結構中度而後修辭否則歷月經歲筆
不直下也維楨歿陞官禮部尚書爲之哀次得詩文
若干卷曰存笥稿刊于關中再刻于蘇州陞叙之曰
余觀作者之林其長短較異卽能屬書摘辭而聲詩
不振抑或以近體取重古體絀焉尺有所短寸有所
長非虛語也獨崆峒先生得其具體王子與之後先
入室皆得擅場卽關中多才賢此兩人者豈易得哉

王子旣博學強識與之抵掌論事四方疾苦九邊要害又可坐而策之曾不得終其天年功用未起命也所著有王氏存笥稿又有續稿並行於世

喬世寧

喬世寧字景叔耀州人也生有異稟日記數千言又強學不倦雖至老未嘗一日不學古詩法漢魏近體法唐文法秦漢融貫於古自勑架燹一時作者斂紳歎服咸稱不及遂卓然爲名家今所傳丘隅集是手自芟裁者也初爲諸生督學使秦公文何公景明唐公龍皆目爲國士嘉靖乙酉舉于鄉果第一戊戌進

士授南京戶部主事凡再擢至郎中掾紳學士莫不
交好各枕經籍書求通其願未幾擢四川僉事分按
川南地川南控引越雋牂牁諸戎號難治盡取故牘
察事所緩急重輕卽連引數十年悉酌以法理決遣
罷之時時巡行郡縣獎吏民之良與罰其怙惡者素
彊執不阿比執政者欲叙其文因蜀之寮案致言於
世寧置之不爲理有蒲人告嘉州人不償貸州笞之
死讎蒲人者謂蒲人毆之死乃爲白其冤瀘人黃蒿
豪猾官府不能制捕得之御史欲重諸法以數問訊
無左驗罪止徙蒿得不死諸所平反多類是於是川

以南無冤民及爲湖廣督學使湖地綿邈試士歲必
遍罔所遺逸士所擢拔無愧顏其所厭抑無紬辭人
人爭自濯勵文教大興又敦本樹標因質成善湖之
士莫不以名檢德行相爲引重故士之以文藝舉以
才誼著者一一皆所滋植故今雖去楚幾千年士人
感奮不啻一日謂善教之得人心者非耶歲庚戌虜
犯京師上遣近臣募兵河南議緒紛拏世寧適以
叅政蒞任獨選丁男壯者從軍裁損供費後諸應募
惡少多道亾且鹵掠獨大梁部署兵全無不法者尋
督餉小灘小灘故監兌於主事第主事多聽商賈罔

糴計使轉餉者無階輸官因翔其值得倚藉爲利因
令轉餉者分糴附近邑奪商賈利而坐失主事陰所
操縱民便之河南至今遵爲法成自河南擢四川按
察使以憂歸在官十五年歸十年自讀書外絕無嗜
好聯親戚同姓以恩義周其窘乏敬老撫孤嘗作糾
宗碑族譜急鄉里之患不責其報司馬楊博中丞殷
學御史崔棟交疏薦之竟不肯起未幾卒世寧行足
世師鬱爲儒宗其所建造率鑿鑿副名實抱奇不售
自靳其用迺後人咸克世家業雖不當世後必有達
乃其所歟

魏學會

魏學會字惟貫別號確菴涇陽人十四爲諸生嘉靖
癸丑登進士授戶部主事歷兵部尚書兼副都御史
學會以南大司農謝政家居適虜寇西北羽書旁午
奉詔督陝西三邊軍務屢辭不獲則移書政府罷款
議戰執政報書如指始就道比至固原虜酋明莊二
部各擁衆數萬擾邊三戰三北之斬明安走莊酋獲
其部落五百餘級上嘉其勛晉太子少保廕一子
世襲錦衣千戶賜金綺有方方計圖火酋而有寧夏
之變呼拜父子故降夷宿有叛志會撫臣以事摧折

之遂殺撫道據城以叛人心洶洶至則發二檄僞檄以緩之旋移檄各鎮徵兵餉而自統大軍駐靈州以偏師駐花馬鳴沙諸處扼賊要害使不得渡河窺陣又分兵收服四十七城堡以孤賊勢賊果大括城中金帛婦女賄虜時時與虜出入則多發敢死士夜銜牧檣虜巢牽其反顧兵餉四集則進師薄城下圍焉城堅不可拔計惟決水可灌灌城恐多傷士民且促之從賊不便乃築堤障水實土塞閘水圍城如帶漲七八尺城浸且圯城中懼且譟曰此可以行間矣乃射書城中疑賊黨使自相圖居民亦多受計爲內應

未幾哮氏果與其黨自相殺八月甲子夜城南門啓
我師鼓噪入哮氏闔室自焚死寧夏以平先是言官
急欲攻城有議以逗遛者詔逮曾問狀旣行去城破
之日月餘耳何得言逗遛縉紳爲上書白寃章滿公
車終不一言自明而 上感悟還官歸里亦不錄功
廷議惜之學曾魁岍偉杰平生慷慨多安攘大略明
習邊事而士大夫所嚴事則其操履端方議論不阿
閭閻侃侃郎計部時有權璫爲商人居間欲冒支芻
糧銀鉅萬大司農業許之矣趨而前曰豈其以百姓
脂膏國家府庫爲此輩潤囊橐耶執弗與大司農亦

無以難之嘉靖中分宜相欲改郎吏部需一見始決
謝不見亦不果改蒲坂楊公總督薊遼欲假事推轂
不肯受事再強之則曰度支郎殿最有主者不敢當
督府也未幾楊公入爲大司馬又欲得爲屬固遜亦
不果改其生平不干進類如此督餉宣府時立交兌
法吏不得緣爲奸適虜騎薄城中守者不知所出遽
攝戎衣乘城指授方略虜遁去邊人大喜謂折衝禦
侮乃不在秉鉞在主計耶頃之擢光祿寺少卿松江
輸白糧不鑿當輸者罪其鄉人執政者以爲言不可
再言再不可於執政門人也而守官不骭法如此尋

拜都察院右僉都御史巡撫遼東遼有叛卒黃勇者
數勾虜爲邊患 朝廷懸重賞購之不能得至固不
問或以爲言則曰勇本吾人向處置失宜故外通耳
我且撫而用之何購爲語傳虜中勇以爲信然襍市
夷入城偵知虜在速酋帳下乃閉之甕城中而執之
虜患以寧會當事者以修怨故抑其功止晉俸兩級
尋以棒槌厓等大捷晉右副都御史巡撫如故尋以
疾告庚午起爲兵部右侍郎改吏部轉左時新鄭高
公以閣臣攝部事閣務繁重部事一切倚重焉爲立
年格杜請謁新鄭勁直難下人獨禮重之每事未嘗

不稱善萬曆初元新鄭與江陵同在政府各以才雄
一世顧皆倚重學會二相失歡而江陵欲得爲助
心知與高公至篤也乃設事嘗之是時有疏論高公
者矣正色語曰二公皆當時名賢同心爲國卽有失
不難盡言江陵爲改容謝焉以何高公策免廷臣失
色獨大言曰上踐阼甫數日首逐一顧命大臣豈
正始事且此詔出何人手草不可不明示百官衆爲
凜然朝罷更要九卿諸公詣江陵所諸公有至有不
至而江陵稱病謝罷客高公遂行當是時江陵公以
師保朝委裘與馮璫表裏用曾獨斷斷如也天下聞

而壯之未幾晉南都察院右都御史未行而有列白簡者有 詔褫新命以侍郎還里里居又數年爲歲癸未江陵公敗乃起爲戶部侍郎未任改右都御史督倉場有所不合尋陞南京戶部尚書其時言路大開有羣擊執政冢宰者 上意頗動諸府部大臣合疏保留次及南都九列曾曰大臣進退取自上裁國是乎人情乎諸公心服其言顧重違宰執意相視首鼠奮然曰此自出魏某不可不以相累也諸公乃不復言保留事後月餘果有言之者其履方守正不詭隨如此遂再疏乞骸骨後又數年而起大司馬有臨

洮與寧夏之役嘗著四禮儀式爲鄉人祭酒每事爲
綿蕞以行及居兩尊人喪先後六載不酒不肉不涉
足中門事兄如父視族黨如其手足視鄉人饑溺由
已輕重賑之無不滿意去而自處甚約蓋秦俗以商
販爲業卽士類不諱持籌獨有拔葵斷織之風焉歿
之日里人皆家臨巷哭尸祝於社其內行醇備又如
此所學主誠信不欺文宗司馬子長書宗晉俱得其
逸趣所著涇陽志遼陽奏議詩文若干卷

李世達

李世達字子成號漸菴晚更號廓菴關中涇陽人生

而穎異日誦千言自其髫年卽具博大之器卓犖之
識一時薦紳先生咸器之年十二督學使者殷公置
高等補博士弟子貢尋爲方伯楊恪愍公所知諸所
崇禮備至西安守石州胡公甫下車見而奇之與爲
忘年之交當是時已瑩精大道孔孟根宗伊周事業
日在寤寐中嘗夢謁高皇帝授明珠一命曰善自
珍之異日當爲國寶也年十九登嘉靖壬子賢書丙
辰成進士授戶部主事癸亥調吏部考功司主事已
調文選以養病歸隆慶改元起陞稽勲員外郎未幾
調考功戊辰陞本司郎中調文選丁曾大父憂三年

起陞膳黃通政給假回起陞南太僕卿 神宗馭極
陞右僉都御史巡撫山東陞右副都御史總理河道
戊寅以原官巡撫浙江旋告病復以原官起總督漕
運兼巡撫鳳陽甲申陞南兵部右侍郎改戶部是歲
陞吏部左侍郎丙戌陞南吏部尚書改南兵部尚書
叅贊機務名爲刑部尚書改都察院左都御史掌院
事壬辰以六年滿加太子少保癸巳乞骸骨歸奉
旨馳驛養病巳亥卒年六十有七計聞 上震悼久
之賜諭祭謚敏肅始在戶部監兌湖湘旦暮竭心計
佐度支之急前後入銓司佐黜陟品藻人羣百不失

一會大計當事者拱手聽裁卽見斥者無不心服以去時徐文貞在柄地而秉銓者爲嚴文靖時世達與陸莊簡同爲司屬得以揆揚側陋薦進之往往從田間躋華廡列卿貳銓局之公流聞宇內前後所未有也其開府山東議班操蠲積逋減馬價著爲繫令時蔣范儒以明經舉安廷璞李遐齡以知印擢楊果趙蛟以都吏進而白東阿朱萊陽一挂吏議又力昭雪之不以身格爲軒輊也膠河議起身履其地相土宜權經費所爲條析利害甚具東土不至勞民傷財爲大役累其功居多戊寅改撫浙江不數月疏辭疾引

退八年起督漕河念寶應湖險惡歲漂舳艫無算爲
請開越河殺水勢列五款以上綱領節目犁然畢具
朞年而竣比原估料價省費一萬有奇晉南太宰與
剛峰海公意氣相期擔荷國事所甄叙羣品如矚眉
睫大察汰遣數百人下逮輿臺無不悅服者入爲大
司寇章數十上無非平允詳慎務廣上好生之德
時上惡邊臣僞增首功怒至不可解乃劑量于輕
重之間以定厥罪而比附重辟執不奉詔卒出其
人于必死之地真回天力也會密遣廠校偵部事慮
弊竇不可長屢疏明非體乞亟罷去上乃已權璫

馮憑藉威靈勢張甚在事諸臣莫敢誰何具疏先革其
禁近供事徐正罪以杜禍源是又發宮闈所未發之
奸而開廷臣所不敢開之口已御史職雄俊所抨擊
無與抗者往臺長不甚有所甄別世達謂吏治日衰
民生寡遂皆職此之繇乃以考察例行之斥韓介劉
瑜黃正色輩五六人臺中始悚然改觀易慮壹以奉
公爲急且申明憲典傳布天下俾撫巡無得以問覲
相加遺所薦下吏亦無得執贇及門違者論如法于
時道路風清苞苴弊絕嗚呼盛矣生平正以褫躬忠
以徇國不難以一人排羣議觸忌諱侃侃然貞而不

激通而不隨宏而不疎細而不忼獨斷于是非襍還
之中抗色于傾側危疑之際國事旣濟身名亦全誠
可謂臣主相遭千載一時也所著有奏議八卷

南逢吉

南逢吉字元真渭南人生而穎慧不倫九歲通小戴
氏大義後舉於鄉第三人時大復何公試其文歎曰
奇才也計當魁已果然已會試不第師事陽明陽明
曰關中自橫渠後有所振發興起而進於道德聖賢
者將必自吾元善昆季始已舉進士授禮部儀制主
事仰贊太廟明堂諸大禮以備一代獨偉之典而當

屬草多出其手在禮部七年出知保寧保寧公私冗
奸不可詰振偷刷蠹祛故張新與之更始暇則課諸
生萃諸校之儔而督教之一時得人爲盛舉人傳太
者有隱操上官率不爲禮獨式其廬而問焉諸驛傳
徭役里甲民兵悉有定畫義民史俊輩以捕盜誣論
死者十一人寃十餘年莫雪者一訊雪之萬口歸明
在保寧四年獨用嚴治巨室銜者造飛語中之陞雲
南督學副使命獨以守入覲會有佐前銜者遂改知
歸德府歸德以州陞又新造當三省之交其難倍保
寧治歸德如治保寧陞副使備兵鴈門晉之阨塞巨

鎮也在兵備以督撫總兵在日惟飾具需遷慨然曰陣法不習匪我制虜虜實制我今之邊弊有甚於此者乎於是諭三關將士如令甲習之又按志盡復其演武場爲豪家據者當是時三關未分部也獨數巡行三關外軍聲大振一日山下有牧虜數十騎望見于旄來知有備輒遁去其爲虜憚如此又嘗條上備邊便宜五事詞多觸忌諱執政不之喜格弗上乃考察用前飛語罷時長子軒舉進士爲翰林吉士後奏銓部主事績上書詔許以原官致仕事父母孝師事瑞泉公竟其世無異財哀產則盡以父兄所貽讓孀

嫂遺孤嘗損地十數畝爲義倉輸粟以振族之乏者
石疊李中丞故憲友也嘗約婚不果及李卒復議婚
曰夙有言余可幽明負耶遂許之乙卯關中地大震
兇徒乘之鵠張四掠勢如燎原乃糾邑壯士得數百
人激以太義諸壯士無不人人奮也是日擒殺倡亂
者四境以寧已巳邑不歲焚者數十又輸粟數百石
於官賑全活者衆鄉人德之骨氣鋒稜峻潔而剛明
果斷故其行誼種種合道至臨事變屹不爲動升沉
等之浮漚爲兵備時有窺當塗意勸之通間者曰出
處有命吾惟信心俟之可枉已徇人爲耶風神軒軒

若霞舉 穆廟嗣服進階中憲大夫贊治尹詩文希
盛唐兩漢所著有姜泉集越中紀傳若干卷藏於家
註解會稽三賦刻在會稽郡中享年八十一

杜棠

杜棠字善政三原人儀貌豐偉剛毅寡合獨與靖川
處士馬尚賓爲友博物洽聞經明行修尤善星遁風
角之術由鄉舉任真定通判調彰德時靖遠伯王公
驥正麓川舉寇 占望運籌爲衆耳目賊平 上賜
美女一人仍陞 威方司郎中叅贊戎政復調南
京戶部所在人以識大體稱南部堂後樹忽冬花衆

譽其長曰此堂尊之瑞也棠正色曰冬花春秋書異
何瑞之有其剛正類此性至孝母喪廬於墓側時友
人馬尚賓刲股和羹養親愈疾涇陽處士師維學亦
執喪廬墓遠近稱三孝焉後陞雲南知府政績著聞
以老乞致仕詔進三品階通議大夫卒年八十一

張原

張原字士元三原人正德甲戌進士授吏科給事中
上書言十二事忤旨謫貴州新添驛丞嘉靖初召復
兵科尋擢右戶科原感知遇益以諫諍爲已任再逾
年所上四十餘章言皆剴切至論國家大計及進賢

退不肖詞嚴色正凜然風生 上亦多嘉納之後以
議大禮廷杖卒隆慶初贈光祿少卿

劉琦

劉琦字廷珍別號北郭洛川縣人也舉正德甲戌進
士授行人司行人嘉靖乙酉擢兵科給事中時值
聖上新政卽陳六事 上嘉納焉嘗被旨差放冬衣
布花因極言侵漁十一弊且日詣衛衙支放雖經寒
暑遇風雨亦不廢僚長嘗推其勤勵不可及錦衣衛
多權右乃愈振風采有玩慢者卽疏治其罪騰驤衛
所統力士又率內豎廝養人也慣以私債冒領官銀

以取利廉得其情俱寘于法是年冬當述職期多有
假稱緝紡嚇詐人財者琦上封事請旨下金吾捕治
併上親賢遠佞疏他如峻宮牆之禁嚴宿衛之舖一
劾而中官逮罪者四十人皆人所不敢言者一時京
邑爲之肅然嘗存恤軍士嚴督五城及諸衛司勿得
匿情其假克軍妻者皆察治之衛司謂給事真神明
也未幾奉命清軍條舉三十事切中時弊咸下司馬
勘行凡比試襲廕同事諸大臣中官多請囑以從寬
貸竟劾治之雖事干勲戚權貴亦不顧也是時京師
大饑請行煮糜開倉之政饑民存活殆億萬計盜賊

尋以屏息河南關司都司相通爲奸以庶易嫡發其
罪俱罷官若乃衛卒病發誤入宮門極力請救以從
經典妖人有犯繫晉獄當事者惕於權勢莫任其咎
乃抗疏陳其顛末 上命山西鞠訊得旨依擬發落
然妖人者又爲權貴所庇遂發其隱過謫戍遼東瀋
陽衛厥後 上曰劉琦者是嘗進讜言者也因東宮
大赦天下得還原籍抵家五年疾作而卒琦自童孺
以及患難顯微之際咸以忠孝自砥雖遭誣謫人皆
惜之

張治道

張治道字孟獨長安人兒戲時卽能督約羣兒嘗從
大父觀碁數次卽從旁指畫勝負率奇中人卽大異
之稍長父命之商顧好書不好商乃就鄉校師學書
始授讀卽穎異絕人爲諸生其文辭率試高等又嫻
於詩賦議論如懸河而性剛氣豪慕義尚奇節一時
諸生咸推先畏服之正德癸酉舉於鄉甲戌登進士
第授長垣令三年以治行徵入會都御史怒不面辭
輒論以任情操法過嚴僅授刑部主事於是與部僚
薛蕙劉儲秀胡侍約爲詩會並以詩名都下都下稱
西翰林然意不樂於官矣會又夢其母病乃卽上疏

引疾歸歸二年當考察期御史又拾掇都御史言論
落職自是以志業不伸遂棄官不就乃一意讀書爲
文章尤好杜工部詩與秦漢人文其始詩學杜擬爲
之久之句意體裁無弗杜者文復氣雄語質當於事
實卽不定擬秦漢何人然唐以下無師焉與王檢討
康修撰一見語合乃數與縱論詩文又數與遨遊終
南鄠杜間遇山水勝處輒命酒歌吟賦詩立就或語
及古今天人之際至浩渺闕肆時人莫測也時薛蕙
在吏部望其就官爲書固謝之已而侍郎霍韜御史
郭登庸又皆欲薦起又固止竟不復出往在長垣時

諸上官令不便者輒請更令或上官重更令輒抗議
執請不顧避邑故多豪強爲民害者乃按捕諸大豪
論死者十餘人已又修長垣城修孔廟增學舍改佛
寺爲子路祠至其條馬政事與止塞黃河決口未盡
施用後利害卒如所指陳人至今稱焉始去長垣人
爲立去思碑後九年又就爛柯臺祠祀之以其才識
使得究所施卽古將相之業奚足道哉顧獨以才高
語直爲時大忌又自負不能下人年甫三十餘而歸
比卒時年七十歲矣家居者幾四十年所著太薇前
集後集嘉靖集少陵志長垣志凡數十卷始在祔時

一僧持綵筆授之及誕夕又夢僧以綵筆贈占曰文明之兆也後果驗云

胡侍

胡侍字承之咸寧人正德丁丑進士授刑部主事歷鴻臚少卿時追尊獻帝議者力辯兩考之非侍上言祖訓兄終弟及蓋嚴嫡庶防覬覦爾魯嬰齊不受命歸父漢病已不受命昭帝何以受命爲哉唐睿宗不當兄中宗宋太宗不當兄執祖以其爲君也不當稱兄則不當稱伯明矣上怒其狂率出爲潞州判官

王懋

王懋字昭大咸寧人正德丁丑進士授行人以諫止南巡廷杖左遷國子學正嘉靖初詔復行人陞俸一級尋拜監察御史時廷臣議禮不合相繼去位有杖死者懋上疏論救謫高縣典史數遷至懷慶知府以疾乞休卒於家

裴紹宗

裴紹宗字伯修渭南人正德丁丑進士除海門知縣武宗南巡受檄署江都事貴幸憚之不敢干以私比駕旋省費數萬緡尋擢兵科給事中朝政以闕輒直

言無諱後以議大禮廷杖卒隆慶初贈光祿少卿

許宗魯

許宗魯字東侯號少華陝之咸寧人也正德丁丑舉進士選翰林庶吉士己卯授雲南道御史嘉靖壬午按宣大癸未陞僉事湖廣提學三年陞副使兵備霸州丁亥復改湖廣提學己丑陞太僕少卿壬辰陞大理未幾陞僉都御史巡撫保定自保定歸十七年而當庚戌之冬復僉都御史駐昌平己又陞副都御史巡撫遼東壬子乃致仕歸始爲御史也卽劾論侍郎巡撫兩人會宸濠事起又言上親王護衛宜隸之守

臣其刷卷蘇徽盡按諸大猾置之法所入銀穀至百數十餘萬世宗御極又首上封事中有勤視朝罷傳奉絕貢獻惜爵賞重邊備寬徵歛尤關切時弊者已又言常湯鄧劉之後議當復其封爵大同將卒素驕悍難制立罪其尤甚者一二人於是將卒帖然先是太監劉祥乾沒邊餉以萬計然罪止罷鎮復請下祥於獄祥大懼卽如數抵償而御史曹嘉論諸大臣也有給事中希諸大臣意論謫御史宗魯力奏御史無罪至其劾武定侯郭勛太監蕭敬兩疏關利害尤大後以地震上疏又言羣小竊政柄宮壺議外事國

是以定而復易罪人方獲而遽釋蓋猶指助敬輩也
一時以爲危言宣大故有大邊正德初以地遠棄去
不守然邊勢日蹙矣宗魯行邊顧歎曰大邊急宜復
者乃遂條畫狀聞而當事者難之因補築近邊踰月
工完上賜以銀幣疏謝且辭因請上無忽重地
後宣大日益難守人始思其先見云湖廣以屬地曠
遠往學臣數歲不一至宗魯歲試輒過所至以行義
倡士風楚自是益多名士旣去霸州士日益思之乃
爲具白撫按於是復改督學楚中其繫時望若此是
時又以救楚府二闕與御史力諍不屈二闕得不死

人尤服其鯁直而太僕時禁中貴人不得與事中貴人銜之往保定以近畿民苦甚乃嚴覈驛傳又定府州縣徭賦等式已又以築堤捍漳沱河有功上特賜璽書銀幣旌焉時南給事有與之隙者論罷歸庚戌會虜警給事中張壺御史張洽合疏薦之召復都御史駐昌平昌平故無邊備議修邊牆三百里墩堡數百又疏請鞏昌設一大將統入衛邊兵昌平改叅將守陵寢以鞏華分守駐懷柔爲東遊擊白羊口爲西遊擊又言昌平得一兵備治京北霸州者以至京卽昌平撫臣可罷不設議未盡施用無何乃移

撫遼東至卽議處鹽課課大增諸軍占種民
令悉歸之民遼東故與三衛諸夷互市羣議北虜亦
開市遼東上疏駁論不可者十事遂寢遼人甚賴之
力求致仕歸別構草堂積圖書其中日召故所與遊
者置酒賦詩亦時時作金元人詞曲爲樂所著少華
集續集與遼海歸田諸集數十卷其詩足繼唐音文
復精典有漢魏風而作字又精諳古法諸行草大小
楷書雜置法帖中人莫能辨至老猶能作小楷字當
其得意時一揮輒數十紙不倦得其詩翰者咸珍玩
藏之謂當代二絕云

杜鸞

杜鸞咸寧人正德辛巳進士授大理評事李福達之
獄郭勛居間席書亦助之鸞上疏劾勛及書乞將二
人先正國法徐命多官集議福達之罪不報及獄反
鸞逮治削籍

周尚文

周尚文陝西西安人多謀善騎射讀諸書通大義清
約愛士飲食同甘苦能得士死力善用間諜悉知虜
中委曲故戰輒勝其總兵涼州時築凍牆募力士伏
渡口殺套虜悉中肯綮自壬寅以後虜數入宣大山

西無寧歲邊將望風奔潰惟尚文數當虜有功沙城
慄來二捷績尤奇絕蓋近時名將也辛年七十有五
後十餘年始贈太傅謚英驤賜祭葬如例

楊宏

楊宏西安左衛指揮使廉勇過人博覽羣史初守備
固原虜入掠撫臣欲稍減奏報之數宏曰不可失事
罪小欺君罪大坐是罷歸以薦陞都指揮仍守固原
楊一清爲總督宏請築紅古城募衆屯田扼虜入寇
之路掌陝西都司事平漢南盜斬首八百餘級陞總
兵鎮松潘番酋久爲亂宏至集將吏斬以徇百姓大

悅平大盜鄆本恕廖林子等斬首數百級降者二萬人以功累陞南京都督武廟儲位尚虛宏疏宜早定以係天下之望不報召入後府時番亦不刺據西海入河套駐牧邊患孔棘宏曰兵少敵衆宜通貢哈密專意虜虜出套乃以河西改鎮守淮揚總督漕運剔蠹清逋增制淺船詔回南京中府淮父老傾城攀留泣擁路爲生祠累疏乞歸許之卒賜祭葬如例

補遺

郭文

郭文字博道陝西渭南縣人洪武十七年舉人除江

西道御史建言謫戍遼東起四川什邡知縣致仕

劉昭

劉昭字克明陝西邠州人景泰二年進士授兵科給事中天順元年陞通政司右叅議左通政成化九年陞工部右侍郎十五年陞尚書二十年加太子少保改戶部尚書尋致仕卒計聞賜祭葬昭美姿儀善談論通政務敷奏甚稱英廟意嘗值端午節駕幸廣寒殿大臣俱從上問劉叅議安在左右以昭秩五品不得與對命特以一品服賜之其寵如此然其才幹亦有過人者故所至皆有能官之譽在部最久所

言動中事幾故徃徃見聽陰有節省之益其致仕落
職益爲時要喉言官所論以其子錦衣千戶綺之事
及之云

鄒應龍

鄒應龍字雲卿陝西長安縣人嘉靖三十五年進士
由行人選廣西道御史劾嚴分宜父子陞通政司右
叅議累陞僉都巡撫雲南

孫丕揚

孫丕揚字叔孝陝西富平縣人嘉靖三十五年進士
由行人選浙江道御史巡視兩關四十五年巡按順

天四十四年巡按淮楊隆慶元年養病四年復除本
道五年刷卷京畿本年陞大理寺丞効大學士高拱
曠科臣程文誣論回籍六年仍復原官累陞吏部尚
書加太子少保萬曆己酉再起原官管內外察典尋
歸卒

溫純

溫純號抑齋陝西三原人嘉靖乙丑進士歷官兵部
右侍郎兼都察院右僉都御史巡撫浙江時值兵民
兩變又水旱爲災純悉心撫字嚴肅下吏不動聲色
而凜然自不可犯尋轉戶部歷左都管內外察典人

言侵及遂拂衣以去公論惜之

趙應元

趙應元字文宗陝西涇陽縣人嘉靖四十四年進士由邠縣知縣選浙江道御史巡按遼東丁憂復除河南道巡按湖廣以劾張居正事爲民復補河南道陞南京大理寺丞卒

馬自強

馬自強字體乾號乾菴西安同州人嘉靖癸丑進士選庶常授檢討久之充經筵講官纂脩 肅宗實錄陞國子祭酒時科條久弛漸失教學初意毅然以振

飭自任首按士習爲姦利者取累朝訓典申明之絕
請託抑躁競日以正學廸諸生成均中咸爽然易觀
聽焉 神宗在東宮爲講讀官凡所進講不爲微文
奧義務取目前易省事款款曉譬冀有所感動 上
聞而甚悅 上登極擢禮部右侍郎充日講官丁內
艱歸 上嘗與元輔張少師言自強所講解易省又
間問服將闋否服除陞禮部尚書仍充經筵講官宗
藩繁衍諸請名封婚祿歲以千計中多詭冒垂越而
先後條例亦自相牴牾以故王府科宿猾習其穴竇
交結諸藩狡役出入爲奸莫可究詰一一清其源本

協于情法盡汰諸積胥之無良者凡王府章疏至親
爲裁決隨榜之部門明示行止由是諸篆隸無所索
公宇肅然丁丑知貢舉世廟實錄成加太子少保
戊寅進太子太保文淵閣大學士入辦閣務甫月餘
而一疾竟不起矣計聞贈少保謚文莊遣行人護柩
歸

雒于仁

雒于仁號少涇三原縣人萬曆癸未進士授直隸肥
鄉知縣丁亥調繁清豐縣戊子陞大理評事己丑建
言酒色財氣四箴最爲激切上怒特甚賴時相寬

假得免廷杖竟落職爲民

李伸

李伸字道甫三原人進士爲監察御史按江西能預防宸濠奸擢守嘉興以道自重言笑不苟對吏民不怒而威有大豪侵官錢事覺在繫奸利益甚伸廉得之令併收其子子聞膽破嘔綠汁死有殺兄謀奪其官者不具輸狀伸一訊服於是奸惡束手無敢撓者每從學士弟子講學相詰難至忘等威及遇事不假毫髮舉措因民不干聲譽中和之政獨推伸焉伸去郡久士民誦思如一日